



24. agosti 2018

UKA 2018/52

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Inuusuttut 18-t norlugit ukiullit unnukkut nalunaaqutaq 20:00-p kingorna Cafèliarlutik kakaotorsinnaanngornissaat, sodavanditorsinnaanngornissaat assigisaannilluunniit najoqqaasinnaanngornissaat pillugu Imigassaq pillugu Inatsisartut Inatsisaanni § 20 imm. 4 atorunnaarsinnissaanut siunnersuuteqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut.**

(Inatsisartunut ilaasortaq Malene Vahl Rasmussen, Demokraatit)

### **Tungavilersuut**

Malik aamma Ivana 17-nik ukiullit Kista 16-nik ukiulik Katualiaqatigaat filmeriarlutik. Filmip kingorna cafemut kissartumik kakaotoriartorusupput. Taamaaliorsinnaanerpalli?

17-nik ukiullip Ninap peqataatalu angutaataata Kunuup pilersaarutigaat Valentinap ullu nalliussiniarlugu illoqarfimmi neriniartarfiit arlaanni neriartorlutik. Neriffissaminni iniminniipput nalunaaqutaq arfineq-pingasunut unnukkut qilanaarlutillu asarujoomissaminnut, nerissamaarlugit qalerualinnik pastaliaq, pizza colalu. Taamaaliorsinnaanerpalli?

Pineqartuni tamani akissut naamiuvoq.

Cafe neriniartarfillu kusanartuupput, aalakoortunillu ersittoqarneq ajorluni, imigassallersinnaanermullu akuersissummik peqarput taamaattumik nerisut iggisissaannik immiaaqqamik viinnimillu sassaallersinnaapput. Taamaasillutik cafe neriniartarfillu tamarmik "sassaallerfiusinnaasutut" naatsorsuunneqarput aamma sassaallerfiusinnaasuni inuusuttut 18-t inorlugit ukiullit unnukkut arfineq-pingasup kingorna iseqqusaajunnaartarput aatsaallu isersinnaallutik "angajoqqaamik arlaannik, paarsiminnik imaluunniit allamik isersinnaatitaasumik ingiallorteqaraanni, inuusuttumut immikkut akisussaasumik".

Imigassaq pillugu Inatsisartut Inatsisaanni §20 imm. 4-mi aalajangersarneqarnikuuvoq tamanna aamma Inatsisartut Inatsisaat ukioq manna aatsaat atuutileralutiq pineqanngilluinnarpoq aalajangersagaq nutaaq.

Aalajangersakkat assigusut 1985-mi atuunniupput - allaat suli siusinnerusukkut: 1973-miit 1985-mut assigusunik aalajangersagaqarpoq, taamaallaalli inuusuttunut 16-nik inorlugit ukiulinnut atuutsinneqartunik<sup>1</sup>.

---

<sup>1</sup> § 17Kalaallit Nunaannut Inatsimmi imigassanik sakkortuunik aalakoornartortalinnik nioqquteqarneq sassaallertarnerllu pillugit (Inatsit nr.99 16. februar 1973-meersoq)



1985-miilli sorpassuarnik pisoqarnikuuvoq allaat 1973-miilli. Aalajangersagaq suli tulluuppa? Suli isumaqarpa?

Aalajangersakkap qularnanngitsumik siunertarisimassavaa inuusuttut imerniartarfinniittanngingissaat imaluunniit assigusuni, assut imerfiusuni. Inersimasunik ingiallorteqanngikkuni.

Aamma tamatumap isumaa ajunngilaq.

Kisianni aalajangersakkap ilusaa ullutsinnut tulluukkunnaarnikuuvoq. Imerniartarfiit suli taakkuupput taamaakkaluartorli illoqarfiit amerlanersaanni cafeqarpoq neriniartarfeqarlunilu. Sumiiffiit imigassamik sassaallersinnaanermut akuersissumik pillit taamaattumillu sassaallerfiusussatut isigineqartariaqartut, taamaakkaluartorli aalakoortunik takunniffiginngisaannakkatit imaluunniit takunniffiginngisaannangajakkatit.

Imerniartarfinnili amerlaqisuni aalakoortut siumugassaajuarput - aamma imerniartarfiit ilaanni allaat unnukkut arfineq-pingasut sioqquaterujussuarlugit.

Taava soormi cafeni neriniartarfinnilu eqqissisimaarfiusuni aalajangersakkat imerniartarfinni natklubbinilu atuuttut atuutissappat?

Isumaqarluarsinnaavoq ukiumikkut inuuttut imerniartarfinni allanilu sassaalliisarfiusuni imerfiusaqisuni ingiallorteqartittarnissaat, aamma tamakkunani isersimasut qaatusimaannarneq ajortarmata.

Kisianni inuusuttut 16-nik 17-nillu ukiulli Katuap cafeani unnukkut 20.30 kakaoitorniartut inertissallugit kukkunerujussuuvoq, ila silaqanngitsuliorneruvoq.

Taamaattumik siunnersuutigaara imigassamut inatsimmi § 20 imm. 4 atorunnaarsinneqassasoq, § 32 imm. 2-mili aalajangersagaq, politiinut periarfissiisoq sassaalliisarfinni 18-t inorlugit ukiullit isersimatinninnissaannut inerteqquteqarnissamut, allanngortinneqassanngitsoq "sualummik sassaalliisarfik immikkut meeqqanut inuusuttunullu tulluanngippat."

Apeqqutaalerporlu § 20 imm. 4 ilumut isumaqarnerisoq, imigassaq pillugu Inatsisartut Inatsisaanni aalajangersakkamut § 32 imm. 2 -mut akuersinitta kingorna.

§ 32 imm. 2 sakkugalugu meeqqat inuusuttullu illersorsinnaanernikuuaqut sassaalliisarfinni pineqartunut, illersuinissamut pissutissaqarfiusuni soorlu: Imerniartarfinni, natklubbini assigisaannilu. Peqataanilli inuusuttut cafemi ulorianaateqanngitsumi nuannersumik unnussiuarnissaat inerteqqutigisariaqanngilarput.

70-sikkunni 80-sikkunnilu meeqqat inuusuttullu illersorniarneqarput sassaalliisarfinnut unnukkut isersinnaasut ukiuisa killersorneratigut. Taamanikkulli inuiaqatigiit allanngornikuupput:



Imigassartorneq affaa sinnerlugu millinikuuvoq aamma nutaanik sassaalliisarfinnik peqalernikuuvugut - inuusuttut 16-nik 17-nillu ukiullit toqqissillutik kissartumik kakaoitorfigisinnaasaannik filmeriareerneramik kingorna. Tamanna nuannaarutigisariaqarparput - aamma taamaattumik inatsit naleqqussartariaqarparput, inuiaqatigiinnut ullumikkut inuusunut.

Taamatut oqaaseqarlunga qilanaarpunga Naalakkersuisut akissutaata tusarnissaanut taamatullu partiit allat oqaaseriumaagassaasa tusarnissaannut.

### **Aningaasarsiornikkut allaffissornikkullu pisortanut kingunissai**

Siunnersuut atortussamgortinneqassappat taava inatsisissamut siunnersuusiortoqartariaqarpoq. Allaffissornermi nukiit tassani atorneqartussat, nutsernissaa, tusarniaanissaq aamma inatsisissap misissornissaa ilanngutereerlugit inuup ataatsip ukiup affaani sivilunerunngitsumik suliarisinnaassagai naatsorsuutigaarput.

### **Aningaasarsiornikkut allaffissornikkullu inuutissarsiortunut namminersortunut kingunissai.**

Soqanngilaq.

### **Aningaasarsiornikkut allaffissornikkullu innuttaasunut kingunissai**

Soqanngilaq